



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim

Instagram tiryimyim@aolima

YouTube tir yimyim TAPAK 10



Sorkari tekong meranga Opposition
ola mangar: Ashok Gehlot

Olympic ayongzüka asayatsü
atema Delhi-i bit asütsü: Kejriwal



VOL. XVIII NO. 303 (ADOK 303) DIMAPUR

TENTONÜ (MONDAY)

LUROI (AUGUST) 16, 2021

₹ 5.00

COVID-19 Nagaland: 54 dak putet, 102 taneptsü angu & 4 asü

Kohima, August 15, 2021 (TYO): Deobarnü Nagaland nung nisung 54 dak COVID-19 putet aser 102 taneptsü angu.

"Tesüiba ghonda 24 tsüingda COVID-19 puteta alir nisung 102 taneptsü nguogo. Parnokji Kohima nung 38, Peren nung 33, Dimapur nung 16, Mokochung nung 6, Mon nung 5 aser Longleng o Phek nung anana (2) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züingsema taneptsü angur nisung 26,490 kümogo aser Nagaland nung COVID-19 nungi taneptsü angurji 90.87% lir, ta paisa ashi.

"Deobarnü nisung 54 dak COVID-19 aliba putet. Parnokji Kohima nung 27, Dimapur nung 16, Mokochung nung 4, Mon nung 3 aser Wokha o Zunheboto nung anana (2) lir" ta paisa metedaktsü.

Nagaland nung COVID-19 puteta alir nisung 1,224 anepaludar. Deobarnü Dimapur aser Kohima nung COVID-19 puteta alir nisung anana asü aser parnok

'At Home' cum Governor's Award sentong agiogo

Dimapur, August 15, 2021 (TYO): August 15, 2021 nü Dr. Imkongliba Ao Hall, Raj Bhavan Kohima nung 'At Home' cum Governor's Award sentong agiogo.

2020 nung COVID-19 wara ajanga magütsü aliba Art, Music aser Literature indang Governor's Award agija liasü.

Sempet angurtemji Buddhi Bahadur Thapa (Arts and display of paintings), Kekhrielezo Stephen Mark Medom (Arts and display of sculpture works), Bendangnungsang Ao (Arts and display of painting) aser Squadron band (display of music and Live performance) lir.

Governor, RN Ravi-i sempet angurtem dang lanurtem ajungmesoba atema tenüngsang agütsüba metedaktsü.

"British nungeri India yimten aser rongsenketzüng aziökba dang masü saka lokti aser sobaliba den shisaluyimba rejutem aziök aser iba jagi tanü tashi maparen aika talenba nungi mesala lir" ta pai ashi.

Union Minister Dr Singh tanü Nagaland-i arutsü

Kohima, August 15, 2021 (TYO): Union Minister of State for Education and External Affairs, Dr. Rajkumar Ranjan Singh-i anogo ananü atema Nagaland semdangtsü. Pa asüing Dimapur tonga arutsü.

Prime Minister Narendra Modi-i July 7 nü Union Minister of State inyaktü shimba sülen Dr. Rajkumar-i tang mezüing atema Nagaland semdangtsü.

Dr. Rajkumar-i Nagaland semdangba ya PM Modi-i Cabinet Minister aser Minister of State

Nagaland Police 4-i National awards angu

Kohima, August 15, 2021 (TYO): 75 buba Independence Day benjungmong nung Nagaland police nungi nisung 4-i national awards agizükogo.

Mezünguba nung, Inspector General of Police (Intelligence) K Martin Pienyu nem distinguished service atema President's Police Medal agütsü.

Tanabuba nung 10th NAP (Indian Reserve) Battalion, Zhadima Commandant Vekhosa Chakhesang

züngsema tasür ajak agi 601 kümogo, saka nisung 14 bo tanga tashidak ajanga asü, ta Dr Kikon-isa ashi.

Tang tashi nung COVID-19 alitsü akok ta temolung melemi bilemba sample 289,606 tendangogo. RT-PCR ajanga 104,988, TrueNat ajanga 71,332 aser Rapid Antigen Test ajanga 113,286 tendang, ta Dr Kikon-isa ashi.

"Nagaland nung nisung 639,523 nem COVID-19 vaccine indang dose 808,099 agütsüogo" ta State Immunization Officer, Dr Ritu Thurr-i ashi.

Parnokji frontline workers 60,838, healthcare workers 15,986, arishi küm 45 ser tempur 189,483 aser arishi küm 18 nungi 44 tsüingda alir 373,116 lir, ta paisa ashi.

Vaccine agirtem rongnung nisung 168,576-i dose anaprong agiogo. Parnokji frontline workers 42,100, healthcare workers 12,735, arishi küm 45 ser tempur 108,065 aser arishi küm 18 nungi 44 tsüingda alir 5,676 lir, ta Dr Thurr-isa metedaktsü.

"Art, culture aser music ya pei tebilemba sayutetba tashi tulu lir. Nagaland sobaliba kanga takar lir aser yimtsüing shia indang sobaliba balaka lir. Ajisüaka, tesasatsüka sobaliba aika tsüingsang aser sübosolemtsü kar nung dang dendakja lir. Alemli nungi asen oboula nungeri wazüka aser benshia aruba sobaliba jenjang mejungi kümdaktsüogo anungji asenok külemi item sobaliba tajungtem shia arudaktsüsüla" ta Ravi-isa ayongzü.

Chief Minister, Neiphu Rio-ia o tatsüka jembidang 2021 atema Award dak sendakba maparen metembangtetba ajanga magütsür aser 2022 nung ang agütsüsü ta ashi. Paisa yaküm takok angur nem tenüngsang agütsü aser iba sempet ya Music, Art aser Literature nung lanurtem ajungmesotsü atema agütsür ta metedaktsü.

Iba sentong nung Chief Secretary, J. Alam-ia o jemi aser Nagaland Police nungi Matu Zeliang-i ken ka aten.

tasentem atema Jan Ashirwad Yatra tenzüka nung shilem ka lir.

Asüing nikongdang 1:50 ako meta Minister of State Dr. Rajkumar-i Dimapur Airport atongtsü. Idangji PHED Minister Jacob Zhimomi-i anir Nagaland sorkar ketdangsurtem aser Nagaland State BJP ketdangpurtemi pa pelaa agizüktsü.

Pai anogo ananü Nagaland nung amongdang Dimapur aser Kohima nung arogotem semdangtsü aser Naga NGOs, Civil Societies aser kaketshir teloktem den ajuruteptsü sentong lir.

nem meritorious services atema Police Medal agütsü.

Tasembuba nung Superintendent of Jail, District Jail, Tuensang K Hamtok Phom nem meritorious service atema President's Correctional Service Medal agütsü.

Pezübuba nung Commissioner of Police, Dimapur kübok Temsuyangba Ao, UBSI nem Investigation for the year 2021 atema Union Home Minister's Medal for Excellence agütsü.

75 buba Independence Day nung Naga nunger sobaliba sayu Rio-i Naga yimten teloktem dang telemtetba ka agitsü ayongzüker



August 15, 2021 nü State Civil Secretariat, Kohima nung 75 buba Independence Day amongdang march pass contingent temi shilem agidang tangokba noksa ka angur.

Kohima, August 15, 2021 (TYO): Nagaland nung tanü India nüjiso ngur küm 75 ajungba benjung amongdang Naga nunger takar sobaliba sayuogo.

Tanü Chief Minister Neiphu Rio-i Naga yimtenren teloktem dang Naga yimten latettsü tayongzüka agütsü.

"Alima nung democracy linük tulutiba- India-i alima nung meimchir renloktsü aser nüjiso maparen nung shilem tulu agia arur. India nung tanga state tem den kasa Nagaland-ia terenlok aser azükaru lenmang nung jajar. Nagaland state kanga renlokogo aser tejakleni ogo aser India linük yangerba maparen nung shilem agir" ta CM Rio-i ashi.

India nüjiso ngur küm 75 ajungdang Nagaland aser Naga nungeri iba linük nung shilem tajung agia aruba benjunger, ta paisa ashi.

"Iba linük nung shilem ka süaka asenoki Naga yimten tebilemtsü atema inyaka arur. Iba tebilemtsü ya linük den kasa tain lir. Tesüiba küm ishika tsüingda Naga yimten tebilemtsü maparen tajungba inyaka aruba ajanga Naga nunger teimla ulushio, ta CM Rio-isa metedaktsü.

"Naga yimtenren teloktemi küm aika India sorkar den ceasefire lia arur aser yimjung olemtep nunga tajangzüker ngua arur. Anungji Naga yimtenren teloktem aser India sorkar tsüingda kati ka angatetsüla aser onüktem angatetteptsüla. India sorkari Naga nunger putiotsü aser jenjang balaka aser iba den

yimtenren tebilemtsü ta agizükba atema Naga nungeri pelar" ta paisa metedaktsü.

State sorkari Indo-Naga yimten olemtep nung tiyongtsü nung yariteper ka ama shilem agia arur. Iba mapa nung yariteptsü aser tekaratiba nung telemtetba ka agitsü atema Nagaland Legislative Assembly züingsem ajak den Member of Parliament ana densema Parliamentary Committee on Naga Political Issue tentetogo. Iba ya Core Committee kübok tentet, ta Rio-isa ashi.

"Nübertemi ola adokba tashi angaa NLA züingsem ajak party telemsa yutsür külemi longjemogo. Anungji onoki Naga yimtenren telok ajak dang longjemtsü aser puteptsüsü ayongzüker" ta Chief Minister Rio-isa metedaktsü.

Rio-isa Nagaland-Assam arrtsü mangatettep indang jembidang "tawa arrtsülen tensa mejungi aküm saka sorkar anaprongi tensa süngjemdaktsüsü atema inyakogo" ta pai ashi.

August 5, 2021 nü State Assembly-i Assam-Nagaland arrtsü ken o reprangshimtsü atema Select Committee ka tentetogo. State sorkar anati arrtsü ken o timi angatetteptsüla ta onoki bilemer, ta Rio-isa metedaktsü.

"COVID-19 wara tanabuba ajanga asenoki timtem jenti ajuruogo saka asenok külemi iba wara madak takok nguogo" ta paisa ashi.

"Nisung ajaki akokba tashi inyakasa COVID-19 ajanga nisung takümtem samaogo. Anungji Nagaland nung alir ajaki COVID-19 inyakyim sülen anidaktsü mepishir aser vaccine agitsüpurtemi menungnangi nür kibong aser lokti asoshi bilema vaccine agitsü ayongzüker" ta Rio-i metedaktsü.

Iba wara ajanga state sorkari Agri & allied sector skills, service sector aser trade & commerce tashi itdaktsüsü atema temolung agütsür, ta paisa ashi.

India nüjisonngur küm 75 ajungba benjung amongdang tawa Tokyo 2020 Olympic Games nung India nungeri shilem tajung agiba atema tenüngsang agütsür, ta Nagaland CM-isa metedaktsü.

Nagaland tejakleni anir aotsü aser renlokaktsüsü atema senso ajaki aser talisa lanurtemi shilem agitsü ayongzüker, ta paisa ashi.

State Civil Secretariat nung amongba benjung nung security forces, state police, home guards, state task force, Indian Reserve Battalion dena contingent 11-i march pass nung shilem agia liasü. Iba nung parade commander ji Deputy Commandant, 10th NAP (IR) Nikho Venuh aser second-in-command ji Assistant Commandant, 15th NAP (IR) Mahila Battalion Medemkala Tsudir na liasü.

Maneni, Sumi, Pochury, Chakhesang, Ao aser Angami nunger yartsüngsangertemi shilem agi.

NSRLM-i SHGs 75 nem Rs. 98 lakh agütsü

Dimapur, August 15 2021 (TYO): July 1 nungi August 14, 2021 tashi India nüjiso anguba atema state sorkari "Azadi Ka Amrit Mahotsav" benjung munga aruba pusema Nagaland State Rural Livelihoods Mission (NSRLM), RD-i Hokolbarnü Self Help Group 75 nem Rs. 98 lakhs agütsüogo.

NSRLM, RD-i Nagaland Rural Bank (NRB) den yaritepa August 13, 2021 nung iba teyari agütsü liasü.

Sentong nung Joint Secretary, RD & Mission Director, Imtinenla-i o jembidang "State Mission indang alizüingji bank aser sensakertem tsüingda tesentaktep yanglutsüsü atema lir" ta ashi.

Kümtem süia arudang State Mission aser bank temi SHG züingsemtem nem teyari agütsüogo, ta laisa ashi.

NRB indang Chairman-i kanga

dang molungsoa SHGs nem loan agütsüba ajanga State Mission ajungmesor, ta Imtinenla-isa ashi.

"Tang NRB nungi senotsü teyari agir SHGs 246 lir aser iba külem teyaritep ajanga sensakertem taküm nung temelenshi bentsür arutsü imlar" ta laisa metedaktsü.

"SHGs ajanga sen apuba mapang shitak nung agütsür aser iba atema tenüngsang agütsür. NRB-i maneni SHGs nem teyari agütsüsü" ta Head Office, NRB Chairman, V. Venkata Narayana-ia ashi.

"State Mission-i SHGs ajanga sen apuba bank nung Community Based Recovery Mechanism (CBRM) committee tajung lapoka lir. Iba committee nung Bank Manager aser SHGs züingsemtem dena lir aser iba ajanga SHGs-i loan

angur aser mapang shitak nung bank nem sen agütsür" ta Chief Operating Officer (COO-Programs), NSRLM, M. Rollan Lotha-ia ashi.

"Loan angutsü atema SHG züingsem shiai Household Investment Plan (HIP) yanglur aser ibaji Micro Credit Plan (MCP) ama agizük. NRB-i India nüjiso ngur küm 75 buba ajungba tenung nung loan agütsüba ajanga sensakertem ajungmesor aser iba ajanga Nagaland nung Financial Inclusion mapa tajungba kümdaktsür" ta paisa metedaktsü.

Iba sentong nung SPM-FI, Rajuselie Lhousa menden liasü aser Mission Director, COO-Programs, Imonenla Imkong Phom, SPM-ICB, State Mission, NRB Chairman aser NRB kongsangtem nungi Bank Manager tem aden.

75 buba Independence Day nung sempet balala agütsüogo

Dimapur, Luroi/August 15 (TYO): Tanü, August 15, 2021 nü India nunger nüjiso ngur küm 75 ajungba anogomung nung state sorkari kija aser yimtsüing kar nem sempet balala agüja liasü.

GOVERNOR'S GOLD MEDAL ANGURTEM

Independence Day, 2020 nung sangdongba ama:

1. Principal Director, Directorate of School Education, Nagaland, Shanavas C, IAS
2. S. Khetoshe Sumi Havildar, DEF, Dimapur aser
3. Rattle & Hum Music Society (RHMS), NGO, Kohima, Nagaland;

Republic Day, 2021 nung sangdongba ama:

1. Er. Vizotou E.E PWD(R&B), South Division, Kohima
2. Er. Talitemsu Jamir E.E, PWD (R&B), Mon, Ilika Zhimomi NCS
3. SDO (C), Mon, Ilika Zhimomi NCS

President's Police Medal (PPM) for Distinguished Service:

1. K. Martin Pienyu, IPS, IGP (INT), Kohima, Nagaland.

B. Police Medal (PM) for Meritorious Service:

1. Vekhosa Chakesang, NPS, Commandant, 10th NAP (IR) Bn, Zhadima

A. "Union Home Minister's Medal for Excellence in Investigation" for the

1. Tlemsuyangba Ao, UBSI, CP, Dimapur.

Independence Day, 2020 nung sangdongba ama President's Correctional Service Medal for Meritorious Service:

1. K. Hamtok Phom, Superintendent of Jail, District Jail, Tuensang.

Independence Day 2021 anogo Governor's Gold Medal angurtem:

1. Tlemsuyangba Ao, UBSI, Commissioner of Police, Dimapur
2. Tepunol Yore, DPO, Wokha
3. Er. Nirie-e Nisa, E.E, Office of the Chief Engineer, PHED
4. M. Rollan Lotha, Chief Operating Officer (Programs), NSRLM, RD Department
5. T. Ado Yanlem, NPS, Additional S.P, Mon.

Independence Day 2021 nung sangdongba ama Governor's Commendation Certificate Award angurtem:

1. Er. Vimete Pusa, SDO under E.E, PWD (R&B), South Division, Kohima
2. Er. Nagashe Swu, SDO under E.E, PWD (R&B), Dimapur Division
3. Er. Muzivoyi Ringa, SDO under E.E, PWD (R&B), Dimapur Division
4. Lanuakum Chang, ABSI, 10th NAP(IR), Bn.

5. Tsuponi Tsukru, UBSI, INT
6. Abemo Ezung, Havildar, Narcotic Cell, PHQ
7. Thepuzo Chakesang, Havildar, DEF, Phek
8. Imtilepzuk, Sub-divisional Agriculture Officer (SDAO), Jaluki, Peren
9. M. Akuika Yimchunger, Chowkidar, Directorate of Art & Culture
10. Masatuba Longkumer, Peon, Directorate of Rural Development
11. K. Ngonlong Konyak, UDA, Dy. Commissioner Office, Mon
12. Virhosa, Constable, 15th NAP(IR) Mahila Bn.
13. Tlemsu Longkumer, Horticulture Officer, Dimapur
14. Dr. Vizovol Mekro, Principal, Phek Government College.

Healthcare nung inyaker temi maneni meranga inyakba ajanga yimtsüing asem aser Kohima jila nung colony ka nung temsüa alir noklang nung noklang shilem COVID-19 mozü agitetba asoshi pelaba temaitsü kuli kaket agütsü. Aser itemji:

1. Viswema Village, under Jakhama Block
2. Sechuma Village, under SechuZubza Block
3. Dzuda Village, under SechuZubza Block
4. New Ministers' Hill Colony, Kohima Town.

MENUNGRA BILEMTETER



M. Lepzük Lemtur.
Tasüba Anogo : August 16, 2020.

Temeim oba, nai onok toktsür orr küm ka süitemogo aser na mebileteti anogo ka danga süitema maor. Onoki na kanga menungrar. Nü akümlü mapa tajungtem shibai jembimatsü. Tanü iba anogo nung na bileteta onok sarasadema amonger. Kenü anogo Yisu tsüingdang tepela tulu nung asenok ajuruteptsü.

- Temeim oja, Alemla, Limba aser Kinungertem.

Yimtsüing asem aser colony ka nem 100% COVID-19 vaccination award agütsü

Kohima, Luroi/August 15 (Agencies): Kohima nung tanü 75 buba Independence Day amungba mapang Kohima district nungi yimtsüing asem aser ward ka nem, temsüa alir shilem 100 COVID-19 mozü agiba temaitsü Certificate of Appreciation agüja liasü.

COVID-19 tashidak wara ya kanga raktepa temelaba nung menatepa aoba aser virus tabu tasen poktetyonga aor aser mozü agiba ya temang kumzüka ayutsü asoshi tematiba jenjang, ta kuli sayur.

Lokti tentet balala aser nüburtem nungi mozü agütsü asoshi tenokdangba agüja aser

nungnanga aliba mapang yimdaklir asem colony nung alirtemi takok tajung nguteta mozü agitetba temaitsü iba kuli kaket ya agütsü.

Iba kuli kaket anguba yimtsü asem ya Jakhama Block kübok Viswema yimtsüing, Sechu Zubza Block kübok Sechuma aser Dzudza yimtsüing alitsü.

Kohima municipality kübok colony aser ward tem rongnungi New Minister's Hill Colony ajanga iba kuli kaket ya angu.

State Civil Secretariat nung iba anogomung moatsüsang, Chief Minister Neiphu Rio ajanga kuli kaket tem ya agüja liasü.

NLA speaker Sharingain-i NDPP temzüng Ao oshi nung adokba sayatsü



NDPP temzüng Ao oshi nung meyipba NLA Speaker, Sharingain Longkumer-i sayatsüba mapang Advisor Medo Yhokha densema NDPP ketdangsürtem kar noksa nung angur. Mokokchung, August 14, 2021

Mokokchung, Aug 15 (TYO): Aug 14, 2021 nü Nagaland Legislative Assembly (NLA) Speaker, Sharingain Longkumer-i Nationalist Democratic Progressive Party (NDPP) temzüng Ao oshi nung meyipba ka NDPP Mokokchung Region office nung sayatsüogo.

Pai iba sentong nung jembidang, NDPP ya regional party ka lir, anungji, regional party kaji tera (root) nung sentaktepa alitsübaji kanga tongtibang lir, ta Ao oshi nung NDPP temzüng meyipba nükjidong lemsatop. Ao oshi nung meyipba NDPP temzüng Naga nüchiso amungba anogo sayaba ya jangratemsüka aser ibai Tsüingremer sentong südi, ta metetdaksü.

Iba mapatong ajanga Mokokchung district kübok assembly constituency 10 nüburtem tongteta party

nükjidong angatetdaksütsü aser iba ya ajanga taruba election nungji lenmang aisü nung teyari angutsü imlar, ta pai ashi.

Tanü PDA sorkar ya "telungjem sorkar (united front)" ka ama kümogo, ibai tatishitsü tulu lir, kechiyong asenok asoshi Naga yimden tebilemstüji kanga tongtibang lir. Tejakleni aotsübaji Naga yimden keno ya tama latet nung dang ajungtsü ta angateta telok ajak obang ka sür Naga yimden asoshi jembitsü meranger, ta pai shisem.

Tawa tembangba assembly nunga Naga yimden tebilemstü atema dang khuret süa jembio, aser iba dak sentakba nungsa Aug 18, 2021 nüji tribal hoho-tem den telungjem mensem ka akatsü ayongzüka lir, ta paisa PDA sorkari Naga yimden tebilemstü atema süoki ia bilemba indang kar lemsatopa

liasü.

Iba sentong nung Advisor for Technical Education & Elections, Medo Yhokha densema liasü aser paia mapang tatsüka agia jembidang, NDPP temzüng pei tetsü oshi nung koba NDPP Mokokchung Region-i inyakogo, ibai otsüsütsü mapa ka lir, anungji, tanüingba district-tem nunga kasa mapa ya ajizüka inyak nung ajungtsü, ta paisa pelaba metetdaksü.

NLA Speaker, Sharingain-i shisa tajung agütsüba den NDPP temzüng Ao oshi nung meyipa adoktettsüsa rongsen tulu tenlaba atema aser temzüng meyiptsür (translator) tsürabur Alempokba (Ungma)-i anibelem jenti agia inyaktsüba asoshi NDPP Mokokchung Region President, N. Bendang Jamir aser NDPP Youth Organization President, Bendang Walling nati pelaba lemsatop.

Dimapur nung 75 buba Independence Day mungogo

Dimapur, Luroi/August 15 (TYO): Linük ajunga den külemi Dimapur nunga 75 buba Independence Day ya August 15, 2021 nü DDSC Stadium, Dimapur nung munga liasü, kong Minister, PHE, Jacob Zhimomi ajanga linük nisan sala aser Rashtriya Salute agüja liasü.

Iba sentong nung jembiba mapang, linük nüjiso anguba anogo nungi ajakleni temolungtetba nung tejakleni renloka aor aser timtem balala ajuruaka alima nung tongtipang linük ka kumogo, ta Minister Jacob-i ashi.

Terenlok aser yimji-yimjung lenmang nung danga state tem den külemi asen state-a kasa sür aor, ta pai ashi.

Naga yimten ken o indang süoka jembiba mapang, Naga Political Group tem mapang talangka Government of India den ceasefire nung aruba ajanga küm ishika tsüingta teimla tulu agütsür aser yimjung ken o jembiba tsütsü terenlok tulu lir,

ta pai ashi.

Naga yimten ken o tang tejembidak aliba nung state sorkari tetsüingtai ia shilem tajung agia arur, ta Minister Zhimomi-i ashi.

State nung COVID-19 tashidak azüoktsü asoshi sorkari mera balala agiba indang lemsatopba mapang nüburtem dang maneni COVID-19 tashidak nungi jenbua alitsü yimyatam amshitsü, pai ayongzüka liasü.

Iba sentong nung COVID Vaccination (1st dose) noklang nung noklang shilem agir aliba yimtsüing asem colony nem kuli kaket agütsü, Kevizhapu Kire ajanga temeja ken ka aten, Ethnic Performing Arts ajanga tsüingsang ka sayu aser Musik-A School ajanga telok ken ka aten.

Maneni nikongdang sentong nung sempet balala lema agütsü aser 15 IRB (Mahila) ajanga 'beating of retreat' shilem agia liasü.

Nagaland House, New Delhi nung I-Day mungogo

Dimapur, Luroi/August 15 (TYO): India nunger 75 buba Independence Day nung Additional Chief Secretary & Chief Resident Commissioner, Jyoti Kalash, IAS ajanga Nagaland House, New Delhi nung linük nisan atsüketa liasü.

Iba sentong nung Commissioner ajanga o tatsüka jembiba mapang, küm 75 tejakdang India nunger nüjiso anguba sülen India linük ajungalen nüjiso nguteta renlokogo, ta ashi.

Taoba küm, 2020 nung

Nagaland nem India nung Best Law & Order State sempet agütsü aser ibaji ajanga linük tashi tali itshir. Bendang lima den arütsüa aliba North East state tem tali tesunepba aser tashi taitba akumer, ta pai ashi.

Pai state aser talisa Nagaland House, New Delhi nung inyaker tem den tepela Independence Day salem lemsatopa liasü.

Iba sentong nung staff 100 shi dena liasü aser iba sentong tembangba sülen süngo jemtepa liasü.

ASS-i Orang National Park nungi Rajiv Gandhi tenüng agientsü akhanger



Udalguri, Luroi/August 15, 2021 (Agencies): Assam nung libajen/lipuküm (environmental) atema inyaker telok - Aranya Suraksha Samiti-i Orang National Park nungi Rajiv Gandhi tenüng agientsü asoshi chief minister Himanta Biswa Sarma dang takhangba agütsüogo.

ASS-i 'Rajiv Gandhi Orang National Park' tenüng 'Orang National Park' agi melentsü atema khangogo.

Iba inyakyim dak sendakba nung Aranya Suraksha Samiti, General Secretary, Dr Hari Charan Das-i August 13, 2021 nü Assam chief minister dangi

memorandum ka agütsüogo.

1985 küm taoba Ato Kilonser Rajiv Gandhi nüngtem nung 'Orang Wildlife Sanctuary' tenüng (Rajiv Gandhi Orang Wildlife Sanctuary) melenshia liasü, saka iba Sanctuary tenüng mezüng ama amshitsü aser National Park ka ama yanglushitsütsü atema 1996 küm campaign ka tenzük, ta tezüluba nung shia lir.

1999 küm iba Sanctuary tenüng mezüng ama melenshia liasü aser Orang National Park agi melentsü.

Ajisüaka, 2001 küm Tarun Gogoi-i aniba Congress Sorkari

iba Park tenüng 'Rajiv Gandhi Orang National Park' agi melenshitsü.

"India putiotsü nung taoba Ato Kilonser (Rajiv Gandhi) tenüng teti hon ojang amshia zülutsü, saka pa nüngtem nung iba National Park ajatsü/tenüng agütsütsü asoshi tesendaktep kecha mali," ta memorandum nung shia lir.

Ali sq/km 79 dak tema ayimjema lapoka aliba Orang National Park nung, ozü-sangno aser tzi shiruru dak alai tezü ka atenba/aketba güntok 101 shi (2018 küm asadangtetba) aser Royal Bengal Tigers 24 shi lir.

Mizoram nungeri Assam lushi nung gari lenmang yanglu ta tai tongloktsür

Guwahati, August 15, 2021 (Agencies): Mizoram nungeri miima Assam lushi nung gari lenmang ka yangluogo ta Mizoram den arrtsüa aliba Hailakandi district nung alirtemi ashir.

July 26 sülen Mizoram kübok Kolasib district nung aliba Phaisen yim nungi Hailakandi kübok Bilaipur tashi gari lenmang ka yangluogo ta osang ajanga

ashi.

Ajisüaka, Mizoram police-i ibaji magizüker.

Phaisen aser Bilaipur indang village council tem angatettepa gari lenmangtem yanglur ta Kolasib district nung Superintendent of Police, Vanlalfaka Ralte-i ashir.

Mizoram police-i Assam lushi nung aliba Inner-Line Forest nung gari lenmang ka yangluba Assam police-i

noktangba ajanga July 26 nü arrtsü tensa mejungi aküm ta Hokolbarnü Assam Chief Minister Himanta Biswa Sarma-i assembly nung metetdaksü.

Hokolbarnü Mizoram nunger ta temolung melemi bilemer kari Hailakandi district nung aliba school ana nung bomb pokdaksüba ajanga Assam-Mizoram arrtsü tensa tamajungba kümogo.

Agartala airport nung Bangladeshi nunger 4 apu

Agartala, August 15, 2021 (Agencies): Agartala nung aliba Maharaja Bir Bikram Airport nung Bangladeshi nunger pezü apu. Parnoki India indang kulikaket taila bona liasü.

Bangladeshi nunger pezü jagi taila Aadhar Cards bener Chennai-i aotsü atema tayimtsü kati atutsü lia apu.

Parnokji Dulal Sheikh, Yusuf Sheikh, Aminul Sheikh aser Rejabul Sheikh nunger ta jangjaogo.

Par pezüprong Agartala Police Station-i anir ao aser asüngdangya asü, ta police-i ashir.

Bangladeshi nunger nisung pezü Chennai-i aotsü meranger ta osang tejangja ka

angazük ta Tripura police-i ashir.

Tayimtsü anendak kulikakettem meshia reprangdang taila Aadhar Cards abenba putet, ta parnokia ashir.

Bangladeshi nunger nisung pezü ya ozüng alema India-i aruba liasü ta kuli bushitetogo.

Pema Khandu-i Police 4 nem tenüngsang agütsü

Itanagar, Luroi/August 15, 2021 (Agencies): Gallantry award anguba atema, Arunachal Pradesh chief minister Pema Khandu-i State indang police pezü nem tenüngsang agütsü.

75buba Independence Day anogomung atongtsü anogo ka lia, Tir Ram Nath Kovind ajanga temaba gallantry award atema Arunachal Pradesh Police nungi par pezü tenüng agizük.

Iba gallantry award angur Arunachal Pradesh Police pezüji deputy superintendent of police (DSP) Tab Tech, sub-inspector (SI) Raju Tayeng, sub-inspector (SI) Sushant Saurabh Jha aser CT Nokjo Wangpan asütsü.

State nungi police pezü Gallantry medal anguba atema nümatanga bilemer, ta Twitter ajanga Khandu-i lemsatet.

Bendanga agüja aser tasüita pei wadang nung

tenzükba asoshi Pema-i par pezüprongla dang pelaba metetdaksü.

"75buba #Independence Day benjongmung nung #PoliceMedalForGallantry (PMG) anguba atema state police dang pelar. Tenüng tajung bener arutsüba asoshi DySP Tab Tech, SI Raju Tayeng, SI Sushant Saurabh Jha aser CT Nokjo Wangpan nunger nem tenüngsang agütsü," ta Pema-i lemsatet.

Mizoram: Nisung 467 dak Covid-19 putet; nisung 2 asü

Aizawl, Luroi/August 15, 2021 (Agencies): Tesüiba ghonda 24 nung, Mizoram nung nisung 467 dak Covid-19 positive tasen putet aser iba wara ajanga nisung 2 asü.

Deobarnü, Mizoram nung Department of Information and Public Relations (DIPR) sangdong ajanga angazükba agi, tashidak tasen puteter rongnung Zoram Medical College (ZMC) nung RT-PCR test nung nisung 24 dak iba wara aliba jangjatet.

TrueNAT ajanga tendangba mapang nisung 35 dak iba tashidak aliba putet; Rapid Antigen Test ajanga 400 aser Fluorescent Immunoassay (FIA) test mapang nisung 8 dak Covid-19 tejangja puteta liasü.

Honibarnü, Mizoram nung Covid-19 puteter shilem 5.23% shi ajema aküm. Tesüiba ghonda 24 nung tashidak tasen puteter densema, Deobarnü State nung Covid-19 tejangja puteter nisung 48,462 shi tuogo.

Mizoram nung Covid-19

puteter rongnung tebur 25,148 aser tetsür 23,314 asütsü. Tang State nung nisung 10,656 shi Covid19 agi shirangdar.

Iba tesashi wara adoker külen nungi, Mizoram nung Covid-19 puteter nisung 180 shi taküm samaogo.

Kasa mapang (tesüiba ghonda 24), iba wara agi shiranger, shirnok dak taoba mapang putet, parnok nisung 589 shi taneptsü nguogo.

Honibar nikongdang DIPR sangdong ajanga angazükba agi, State nung taneptsü angur rongnung Aizawl district nungi nisung 413, Lawngtlai - 49, Siaha - 48, Kolasib - 31, Mamit - 31, Saitual - 10, Serchhip - 4, Champhai - 2 aser Khawzawl district nungi nisung 1 dena lir.

Tang, State kübok Aizawl district nung 7,603, Lunglei - 504, Siaha - 187, Kolasib - 1,044, Serchhip - 42, Lawngtlai - 413, Mamit - 520, Khawzawl - 0, Hnahthial - 44 aser Saitual nung nisung 14 Covid-19 agi shirangdar.

Independence Day: BRO-i Sikkim nung wako atsüket

Gangtok, Luroi/August 15, 2021 (Agencies): 75th Independence Day benjongmung nung, Border Roads Organisation (BRO)-i Sikkim nung linük wako atsüket.

BRO-i Dongkha La tenem (18,300 feet) nung linük wako atsüket. Iba Eastern Sector nung Dongkha La tenem ya talangtiba asütsü.

"Tanü, India nüjiso ngur küm 75 ajungba benjongmung nung, tziyim nungi süklep 18300 shi tur Donkyala, koba Eastern

Sector nung pass' talangtiba asütsü, iba tenem nung #Tricolour atsüketa liasü," Ministry of Defence indang Principal Spokesperson, Bharat Bhushan Babu-i ashir.

Kasa anogo, linük tesem balala nung India indang security aser defence force temi linük wako atsüketogo.

Indo-Tibetan Border Police (ITBP)-ia Ladakh kübok Pangong Tso Awatsüing nung linük wako atsüket. Iba awatsüing ya tziyim (sea level) nungi süklep 14,000 shi tur lir.

BSF-i India-Bangladesh arrtsü anükba akangshiogo

Dhubri, August 15, 2021 (Agencies): Bangladesh nung Islamist kiralongrartem aser India telungpurtemi amokmerenba atema Border Security Force (BSF)-i India-Bangladesh kanga akangakang anüker.

Bangladesh nung kiralongrartem aser international boundary anasa aliba state tem nung telungpurtemi Independence Day nung mapa tamajung inyaksü akok ta osangtem angazükba sülen akangshiogo, ta BSF ketdangsür kati ashir.

"Assam aser West Bengal kübok Coochbehar district nung aliba India-Bangladesh arrtsü

ajungalen security akangshiogo" ta BSF Deputy Inspector General, Regional Headquarters, Shailendra Kumar Sinha-i ashir.

BSF-i international border nung 'Operation Alert' tenzük aser iba nung August 16 tashi ketdangsür aser jawan ajaki shilem agitsü, ta paisa ashir.

BSF sepaitemi arrtsülen awareness campaigns ayonga agir aser iba mapang nübortem dang temolung melemi bilemba nisungtem senzusenbongba osangtem sangoktsütsü ayongzüker, ta BSF Deputy Inspector General, Regional Headquarters-isa metetdaksü.

KKHSOU Vice Chancellor Kandarpa Das mapanungi anentsüogo

Guwahati, August 15, 2021 (Agencies): Assam governor Jagdish Mukhi-i tetuyuba agütsüba nung ajemdaker Krishnakanta Handique State Open University (KKHSOU) Vice-Chancellor Kandarpa Das mapa nungi anentsüogo.

Gauhati University indang Institute Distance and Open Learning (IDOL) ochimashi mapa nung shilem agiba atema tai tonglokja Vice-Chancellor Das mapa nungi anentsür.

Yaküm March ita Das ya Krishnakanta Handique State Open University nung Vice-Chancellor inyaksü shima liasü.

Pai kümsük ana- 2006-2016 tashi (IDOL), Gauhati University nung Director inyaka liasü.

Gauhati University indang IDOL nung ochimashi inyakba ken o atema bushisüngdang asüba sülen iba mapa inyakba mapang vice-chancellor, registrar aser director inyaker ajak mapa nungi anentsütsü atema osang agütsü.

Justice Aftab Hussain Saikia-i aniba commission ajanga Gauhati University vice chancellors, registrars aser directors (IDOL) shilem agiba lir ta ashir.



TIR YIMYIM

YIMOBILEM (EDITORIAL)

DIMAPUR TENTONÜ, LUROI(AUGUST) 16, 2021

Nüchisomong pelaa mamonger

Alima nung yimten nüchiso akaba kintem ajak asoshi nüchisomong amongba anogo (Independence day) ya tepelatsü anogo lir, ajisüaka Naga nung asoshibo linük nüchiso amongba anogo ya temulung shirangtsü anogo lir, iba jagi August 14 marudaktsüner aser August 15 a memongner. Atangji, Naga nungertemi India nungertem den yimten temzüng ka kübok alitsübaaji temulung agi magizüktet, kechiyong Naga nungertem o India nungertem na tereprangtsü nung dang masü saka chia ajemba sobaliba nungi tenzüker tamangba yimsü tashi nung meputep, anungji Naga nungertemi India kübok alitsübaaji bendanger kübok alir amai bilemer, iba jagi tanü tashi India temzüng nung nemeter India telongjem anema meinyaktsü ta tenangzükba agir yimsüsürtemi dena Naga nung yimten nüchiso angutsü langa lir ta jembir. Aji oda, Naga nung asoshibo India yimten nüchiso amongba ya pei anogo masü saka tangar meyong anogomong ka mongtsür amai bilemer. Ajisüaka, mongnyonga memongnyonga, Naga nung teimbakati India wako nem salem agüja India nüchisomong mong amonger, kechiyong Nagaland ya India telongjem kübok, anungji Nagaland nung alirtemi onok India nung masü ta ashitsüji tasak kümogo. Aji oda, Naga nung rongnung India nüchiso mong amonger telok tuluba kümogo. Ajisüaka, ano Naga yimten nüchisomong amonger telok aika lir aser item rongnung Naga yimten nüchiso bushir telok balala tenet lir. Item yimten telok tenetprongla nungi lenirtemi Naga yimten nüchisomong sentong nung pei telok tenüng nung nübortem den jembidang teimla ka agütsür masü saka teimla samadaktsür. Ibaji, Naga lima meimertem ajak asoshi temulung shirangtsüka lir. Atangji, Naga limaji ka dang, anungji Naga nungerti ka dang, anungji Naga nungertema president ka aser prime miniter ka dang alitsüla. Ajisüaka, Naga nung nüchiso bushirtem rongnung prime minister aser president aika ali tashi Naga nung yimten nüchiso mangutsü, kechiyong Naga nung nüchi maküma ta iba jagi sayur. Atangji, Naga yimten nüchisomong August 14 nung Naga nung yimten nüchiso bushir telok shia nungi lenirtemi jembiba ojibo tajung dang, kechiyong ajaki Naga yimten temeten aser Naga nung telongjem indang jembir, saka jembiba ama shingaia malir aser lia mesayur. Aji oda, külen Naga nungertemi India wako atsüketa aküm agüja amonger aser külen Naga nungertemisa telok kenyonji balala lemsar Naga nung yimten nüchiso anogo amonger ta asüba ya alimai komaka repranga alitsü ta bilema temulung animesüngzüker. Iba amaisa among tashibo, asenok Naga yimten nüchiso anogo amongbaji asülen nungia jangratema bilema mereprangtsü aser akümlirtemia manidaktsü. Joko, asenok yimten nüchiso amongba anogo nung Naga yimten nüchiso asoshi taküm tenla agütsürtem nem aküm agüja jembiba yaa parnok mezüngmeshir amatoang ka kümogo, kechiyong asenoki parnoki linük tenzüker ama metenzüker aser parnoki imlaba ama meinyaker. Joko, asenok ya o dang ashi mapa agibo linük tenzüker aser pei lima yimten nüchiso asoshi nokdakertembo memesük kümadokogo. Ibaji asenok ajak asoshi shisabolutsü tuluka lir. Atangji, tang linük tenzükerter rongnung tain karbo shitakba yimten tangatetba nung nokdaka alitsüa akok, saka parnokji küm ishika tsüngda angümtema omarbo tanüngba lanurtemi parnok tsüngsü nung manidaktetsü. Item tensa tia ajakji asadanga, tang Naga nung linük tenzükerter telok balala nung lenirtem ajurutepa jembitsüa kati kati lenchii aruteptsüla. Naga yimten nüchiso bushir telok ajak ajurutepa kenbang obang ka memedem tashi, Naga yimten sünepa alitsüa telemtetba kati marutetsü. Ashiko, India nung asoshibo asenok yamai lemsar Naga Independence day amongba ya tajungba asütsüa akok, kechiyong Naga Independence mongzükli asenokisa India nung Independence day meraketa mongtsütsü, anungji Naga lima nung Naga Independence anogomong amongba tobo tanur kisensai amato dang asütsü. Iba tia ya asenoki jungjunga bilemdangtsüla. India government-i Naga yimten ken o tembanga jembigo ta ashibaji, iba amai Naga Independence anogomonga amongtsü aser India Independence day a kecha timtem tenokdangba melii amongtsü ta bilemba agi ashir asütsüa akok. Atangji, asenok telongjema melongjem aser kenbang obanga memedem ser president aser prime minister aikati Naga Independence day speech agütsübaaji India asoshibo Naga yimten tebilemtsü ken o jembitsü mapang tembangba asütsü. Item speech-temji Naga nungertemi pelashishia angar aser agizüker ta mebilemtsüla. Iba jagiang Naga nung shinga Naga Independence day pelaa aser nümadanga mamonger.

OLEMSABANG

Sen Aputepba aser Arogo Tangatetba

~ Akok Amer

Sen aputepba koba dang usuryta ajar ibai Anglo-Norman French oshi nungi aser medieval Latin nunga 'usuria/usura aser usus' ta aja. Tetezü mashiyim agi interest nung sen amshiba inyakyim ta ajar. Wikipedia, encyclopaedia ajanga ashiba agi item inyakyim ya "unethical aser immoral" sen-o-tsü aputepba interest nung amshitepba aser iba ajanga kar dang tajangzük anguba maparen ka ta ashir. Loan agiba dangji 'usurious' ta ajar kechiaser item telok jagi interest jenjang tali nung amshiba agi lir. Shirnokisa sen aputepba amshir parnok dang 'usurer' ta ajar. Saka English nungeri parnok dang 'loan shark' ta ajar.

Morality sense nungi tangatetba kaji, tangar rongsen akaba nung advantage agia interest meshiba. Mesüli legal tsütsü nungi interest ya ozüng ajanga dang telemtetba agir. Otsü nungi angazükba agi, Medieval Europe nung tamanger Khristantem aser Islam nungeri tanü tashi sen aputepba ya temenen ta züngshir. Hindu nungeria interest nung sen amshitepba ya majung ta parnok temeshi kaket 'Vedic texts'nunga zülua angutsü. Kasaji, Buddhism, Judaism, Khristan aser Islam nunga zülua angutsü.

Ashiba agi mapang ka nung ancient China nung nungi shir, Grik, Rome tashi sen-o-tsü interest nung amshitsü ozüng agi memela. Rome yimli nung parnoki loan agütsütet saka interest nung amshitsü memela. Loan agütsüyonga Rom nungeri kanga dang shisadanga interest ajangabo magütsütsü ozüng yanglu. England nung chuba King Henry VIII mapang 1545 AD nung temelenshi ka aru, English oshi jembiba limatem nung interest agidi asünungbo temelaba meshia dang inyaktsü Act ka yanglu ibaji - "An Act Against Usurie" (37 H. VII 9).

Item otsütem ya koda sür yamai aküm aser asen lima nunga koda angatetter? Kechiyong asenok telok tila aser tulutiba ajaki, arogo asüyonga aser tanga tentet asüyongya item inyakyim ya inyaka arur. Rome yimli mapang parnoka aluyimba society (agrarian society) ka liasü. Sen-o-tsü nungdaker aser industrial mapa inyaka aotsü tamakoktsü ka liasü. Senkar aser makartema saku liasü.

John Maynard Keynesi yamai ashi, "... in Industrial systems, savers were not necessarily investors." Tetezü sen akartem rezünga ayurtemji investor's ka masü. Karbo ajak tajangzük angütsü asoshi mapa inyaknür (investors) saka rongsen peria maka. Industrial society nungji sen aputsüji kanga dang tim, kechiyong investors aser rezünga ayur (savers) ya kheni balala ta Keynesi ashi. Saka asenok aluyimer (agricultural society) tensa nungbo industrial systemji meputeptsü. Kechiyong aluyimba society ka nung (savers) sen rezüngertemji ali aser alu peria makai ayurtem lir aser parnok dangang investors ta-a jatetter. Kechiyong ali kibur (land-owners) temji ali peria aliba den pai ali maparen nung projects balala den külemi tajungtiba inyaktetsüa extra resource-temji pa ket nung lir. Anungji shir ali rongsen peria aka parnok sen-o-tsü apua amshitsüji kecha madoker. Kechiyong par lu nung inyaktsü atema teinyaker nem peria dang pa/la taah (wage) agütsütetter. Koda masüba maparen kar nung kari sen apura taputsüri metet shiri mapang shitak nung par lu nung bill-tem agütsür asü magütsür. Item ya metteta apotsütsü akok. Saka shiri mapang shitak nung magütsüteter parnok nem agütsütsüji lemah maka. Kechiyong sen aputsür (lenders) jagi metet shibai apur (borrowers) pai/lai mapang shitak nung magütsütetsü.

Arogotem aser Council-tem nung Kechi ashir

- * First Council of Nicaea, (325AD): Arogo nung tenzükerter interest nung amshitsü memela.
- * Latin Ecumenical Councils: tenzükerter kija masü saka tamanger shiai sen interest nung mamshitsü ozüng yanglu.
- * Lateran III nungaibaji nenshia ashi.
- * Shirnoki interest nung sen amshitiir, Kibuba Benjong (Lord's Super) nung medendaktsütsü aser Khristan yimsü nung tasü dang küli magütsütsü ta ashi.
- * Pope Clement V: (1311AD) pai Usury ya heresy ta aja. Aser paisa pa yimsüsüba kübok shir legislature nung amener (MLA aser Ministertem) pai Usury beshira anendaktsü.
- * Pope Sixtus V: Usury aitsü aser ashi Tsüngrem nungi pilaba mapa ka, temeshi inyakyim nungi jentokba aser Khristan mapatem anema inyakba mapa ta aitsü.
- * Thomas Aquinas: Usury ya tai kechiyong "it amounts to 'double charging' charging for both the thing and the use of the thing."
- * Plato, Cato, Cicero, Seneca: parnok ajaki tai ta ashi.
- * Aristotle: "Interest is unnatural, since money, as a sterile element, cannot naturally reproduce itself. Thus usury conflict with natural law just as it offends Christian revelation."
- * Muhammad: Interest of any kind is forbidden in Islam (Quranic)
- * Cato: "And what do you think of Usury?" - "What do you think of murder?"
- * Christians, (1179AD) nungi shir, shiri interest nung sen amshitiir parnok arogo nungi jendok

Anungji Usury ya temenen mapa ka. Iba mapa yagi sensaker ajemoka yoker, aser lokti nung temeim tepset nung arogotem, arogo mungdang aser lenir balalai temenen ta aitsü. Yihuda nungeri Torah (Tejen Laishiba) ajanga Kechi ashir?

Anitet 22:25: "Nenok den aliba kü nübur sensaker kar nem nai sen aputsüra, sen taputsür ka ama nai pa dang tebenshi aser pa nungi sentem magütsüla."

Levi 25:36-37 - "Sen mesüra oset nung nai kecha tetemlok tagi; saka ne adianui ne den aitsüa, ne Tsüngrem tsübuang. Nai pa nem sentem agia ne sen taputsü, mesüra meyipa angutsü atema ne chiyongtsü pa nem tagütsü."

Ezekiel 18:17 - Sensaker nungi pei teka sota mayu, tetemlok mesüra tali anguba magi, kü yimsü ozüng beshi, kü tsüzüng ozüng nung jaja, tebu tai menaba atema pabo masütsü, pa atangji taküm alitsü.

T. Ken 15:5 - Shibai pei sen sentem magütsür, mesüra tai maka anema süpokrem agir. Shibai itemi inyakdir, kodanga marazütsü(marakzütü ta asütsü südi (English .trans nung shall never be moved ta angutsü)

Mathi 21:12-13 (cf. Mathi 5:17-18) - Aser Yisui Tsüngrem tenla kidangi atu, aser tenla ki telung nung tayoker aser talitem kimai arizüka yok, aser sen melenertem langbang, aser posü ayokertem menden mekeptoktsü. Aser pai parnok dang ashi, Ya zülua lir, Kü ki dang sarasademba ki ta ajatsü, saka nenoki aji rakzükraakter leprunghi kümduksür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agütsü mepishir

Hong Kong nungi Khristantem agizüktsü atema Arogo 600-i renemer



Taküm June ita nung Hong Kong International Airport nungi UK-i aotsüpurtem tangokba noksa nung angur. China-i national security ozüng tasen benokba sülen nisung aikati Hong Kong toktsür tangalen oa alitsü lemtetogo.

August 15, 2021: Church of England nung Arogo 600-i Hong Kong nungi Khristantem aser tangartem UK nung agizüktsü atema sign süogo.

1950s aser 1960s mapang nung Caribbean nungi UK-i arua alirtemi Tenla kitemi sademsadema mouteti liasü mesüra Anglican Arogotem nungi parnok mindoka liasü. Yaküm Canterbury nung tongti putir, Justin Welby-ia Arogoi nisung bendangshidanga züngshiba atema aaka bilemba lemsatepa liasü.

Bristol nung aliba putir Reverend Mark Nam-i, "Tamalen Hong Kong nungi arurtem meyariba ama tanaben mebenshitsu. Ni [Windrush generation] tatalokba kuli aika züngdangogo. Tangbo Church of England-i renema alitsüla aser ajak pelaa agizüktsüla. Asenoki puti otsü nungi tangazükba akatsüla," ta ashi.

Taküm ita ana kija tsüngda nunga Home Office dangi Hong Kong nungi aruner nisung 34,300-i visa atema application agüja liasü. Taruba küm pongu tsüngda nisung

million 1 dak tema UK-i arutsüa akok, ta ketdangsertemi metetdaksü.

UK sorkari, BNO status alir aser parnok kibongtemi küm pongu atema entry visas meshitetsü akok, iba sülenbo senso agitsü akok, ta metetdaksüogo.

China-i taoba mapang British nunger colony, Hongkong nung linük security atema ozüng tesashi ka benokba sülen UK sorkari Hong Kong nungi Khristantem linük nung agizüktsü atema ibasalentong yangluogo.

Yamaji UK nung denomination balala nungi Arogo 600-i Hongkong nungi Khristantem densema nisung aika pelaa agizüktsü atema "Hong Kong Ready" nung sign süogo. Hongkong nungi arur nisung 10 shia nung kabosa Khristan asütsü.

Taküm küm tatemanglen Church of England committee for minority ethnic Anglican concerns (CMEAC)-i mungdang ka ayongzüka agitsü, aser iba senden nungji Arogotem dang Hongkong

nungi arurtem pelaa agizüktsü atema tesayuba agütsütsü.

Taoba Hombarnü Southwark Cathedral nung Church of England clergy of east Asian heritage atema group ka tenzükogogo aser iba group nung tongti lenirji Andrew Zihni lir. Pa ya Hong Kong nung soa intetba lenir ka lir.

Nam ya Newport, south Wales nung aso aser pa lanuwa küm timbaka Hong Kong nung liasü. Par kibong Wales-i aruba mapang nung pa tainlonglong liasü, aser iba mapang nungji pa tereprangtsü soro balaka asübayong school nung aikati pa bendanga züngshia liasü.

"Yaküm Black Lives Matter movement tenzükba mapang nung ni yamai bilema liasü 'Arogo nung east Asia nunger ola kong lir?,' ta paisa ashi.

Yaküm coronavirus wara prok tenzükba mapang nung UK nung east Asia nunger anema inyakba tatalokba kanga bulua liasü, aser iba mapang nungji US nung taoba Tir, Donald Trump-i coronavirus ya 'China nunger wara' ta aiben jembia liasü.

ANOGO ABEN TSÜNGREM DEN

Nendaka mitang

"Ne mulungjang kanga nendaka meitang; kechiyong iba nungi taküm nung tzüpokdak adoker." A. Shin 4:23

Driver kati gari ka nung steering kobaleni anir ilenjagi aoba mesüka asen meimchir taküm ka nung temulungjangi koba tangatetbaleni anidir ibayim jagi takümji atsür odaksür. Driveri steering timi amshia ali tashi kodanga lendong-timtem (accident) ajurutsü makok, saka pai/lai nentak-nentaka aser saksalema steeringji mami lira tenük masepshi nung lendong, teraksa aser tesama tulu ajurur. Ibalaji mesüka kodang aseni asen mulungjang nentaka nüka melilir iba nung jagi tesempatsü aser tamajung o jenti adoka nai aser ni jembiba o ajanga kija aser loktiliba ajunga menendaksür. Aseni asen mulungjang nung timi dang bilema ali tashi tangar yirutsütsüsa tebilemba tamajung adoktsü mesüra tesempatsü o jembitsü makok saka ajak asoshi tagitsü aser tajung dang asütsü.

Anungji aseni kechisa jembir item otem nung asen mulungjangi maitsütsüsa mapang ajak nung saksalema aser nentak-nentaka asen mulungsentsü meita indang indanga litetba taküm kaka asütsü meranga lidi.

SARASADEM

Temeim Tsüngrem, mapang ajak nung kü mulungjang nentaka meita aliba taküm ka süteta litettsüsa Nai ni yariangma. Amen

Küm 100 sülen Armenia nunger Tenla ki ka tanaben lapoktsü

August 15, 2021: Turkey Malatya HAY-DER nung küm 100 dak tema sülen (Malatya Armenians Association)-i iba Tenla ki August 29, 2021 nü Üç Horan (Surp Yerrortutyun) Armenia nunger Arogo Tenla ki ka tanaben lapoka tekülem sentong agitsü, ta International Christian Concern osang ajanga metetdaksü.

Armenia nunger Tenla ki ya Turkey kübok Malatya nung lir, aser tawa Tenla ki yanglushiba maparen tembanga liasü. Iba Tenla ki ya tekülem ki aser cultural center ama amshitsü, ta kasa osang ajanga metetdaksü.

Iba Tenla kidang tekülem sentong agiba dang masü saka Baptiba aser kiyimba densema sentong balala agitsü.

Malatya Üç Horan Arogo Tenla ki ya mapang talangka Treasury & Malatya Municipality meyong liasü, ajisüaka kuli tezülutepba nungbo iba ya Tenla ki, ta zülua lir. Iba Tenla ki ya Turkey-Armenian activist aser Agos Newspaper nung yimobilem zülur asür, Hrant Dink asoba tesem anasa lir. Pa ya 2007 küm tepset aser iba ken o maneni angadanga arudar.

Tenla ki amakba ken o nung Arogoi Sri Lanka sorkar dang mepelar

Colombo (Sri Lanka), August 15 (Agencies): August 13, 2021 nü Sri Lanka nung Catholic Arogoi sangdong ka ajanga, 2019 küm Easter Sunday nü bom amshia Tenla kitem amakba ken o dak sendakba nung tan hopta sorkari nisung 25 anema ken o benokogogo, ajisüaka parnok ya tongti aibelenertem masütsüa akok, anungji sorkari asalentong yanglur tongti nisungtem aputsü atema mera agia inyaktsüla, ta metetdaksü.

Colombo nung tongti putir, Malcolm Ranjith-i, taoba ita

pai Tir office dangi shidi ka zülüogo, saka Tir office ajanga tasüngdangba ka danga melangzü, ta metetdaksü.

State intelligence agencies-i Tenla ki amaktsü atema asalentong yanglurtem meteta liasü aser ajurua liasü, ta osang ka angazükba dak sendakba nung tongti putiri linük Tir office dangi shidi ka zülua liasü.

Paisa Khristantem dang, sorkar dang jashiba temaitsü sayua pei kidang aser garitem nung wako tanak songang, ta mepishi.

Ranjith-i, "Nisung 25 jagi

aibelena mali ta onoki mashir, ajisüaka iba ya tilateri aibelenertem puer tongti aibelenertem chioktsü merangba asü?, ta onoki asüngdang," ta metetdaksü.

Ranjith-i ashiba agi, state intelligence officer kati Tenla ki ana amakertem ajurua liasü, ta special presidential inquiry commission nem metetdaksüogo.

Taoba ita Ranjith-isa shidi ajanga Parliament nung jembiba otem metetdakja, military intelligence-i melung malemba nisung ka liasü saka police-i chiok, ta metetdakja liasü.

Ranjith-isa shidi ajanga, Sri Lanka nung nisung taoba mapang Sri Lanka Tir, tepsettsü merangba, Maithripala Sirisena aser yarisemba aser hadir police ketdangser aikati mapa bendenba densema anti terror nung zübazülemba ajanga iba ozüngtem kübok Mongolbarnü nisung 25 anema ken o benok.

Attorney general-i chief justice dang züngsem aseme akümba high court bench ka tenteta tekaraba nung item ken o angadangtsü tuyuogo.

Ranjith-i mapang shia sorkari Easter anogo nung Tenla ki amakba tatalokba junga bushisüngdang masür ta aiben sorkar aija iba ken o o nung tan hopta sorkari junga bushisüngdangtsü nisung 25 anema ken o benok. takhangba agüja aruogo.

OLONG PAITEP # 5907

	1				2			3		4
5								6		
7			8							
								9		
		10								
11										12
					13					
					14					
15										
					16					

TIPIEN	LANGTSÜNGLEN
1. Balaka - (5)	2. Hai sür inyak - (4)
6. Aika shirangba - (4)	3. Aor tenüng ka - (6)
7. Tar tatsü - (6)	4. Ali telungi talangka lur - (5)
9. Nenü'er jabaso - (4)	5. Tebang kenyongi mazüoker - (4)
10. Sen latettsüba - (7)	8. Ken atema anenzükertem - (5)
11. Tangar kübok alir - (4)	9. Toktepa noktak - (5)
14. Lon nung inokba - (6)	10. Sen - (6)
15. Tzü ayimdak - (4)	11. Benjong agi - (5)
16. Ajok - (5)	12. Telung nung rizünga ayu - (4)
	13. Tebang nung enok - (4)

OLONG PAITEP # 5906 TELANGZÜBA

TIPIEN :	LANGTSÜNGLEN :
1. Aben, 4. Artsü, 7. Lisem, 8. Liwa,	1. Aruli, 3. Balala, 5.Suwar, 6. Belem,
9. Sarasadem, 12. Aket, 14. Mangu,	9. Süjak, 10.Aonung, 11. Dokan,
15. Anünü, 16. Ango.	13. Tinu.



TARITOKER MLA-TEM O TANÜNGBA MLA-TEM NA KASA DANG

Taritoker MLA-tem : Hoi...Külem Party-purtem...Onoki asen Party telemtetba nung maden 'Rulling Govt' support sua parnok den aden-a ta sur onok Party nungi aritok...Ajsuaka tangpo nenok tanüngba MLA-tema Rulling Govt dak orr züklokogo...Anungji nenoka onok amai Party nungi aritoktsüla'ah.

Tanüngba MLA-tem : Waaaa...!!! Onok kodaser nenok den kasa asütsü...??? Nenoki Party lemtetba anema aibelena inyak ako... Saka onokbo Party-pur meeting lia lemteter aden...Anungji onok kodaser nenok den kasa asütsü...???

Taritoker MLA-tem : Ayyeeee...Onok-ia Rulling Party support asü...Aser nenok-a Rulling Party dak züklok...Anungji asenok ajak lemjem ka nung ajurutepogo... Rulling Party support asüba o Rulling Party den orr adenba anaji kecha tepila mali-ado...??? Anungji asenok ajak 'Rate' kasa dang kümogo... Saka tebilemdangtsü ka lir-ko...Kibong nunga ajongbena aier tanütsür aniokra...Kinungtsü tantsüla kimalen meinzüka yutsütsüa kecha shitak mali ako-di...!!! Kar jonglong dang karbo akoksatsüa kecha dekhana mali ako-di...!!!

~ Lilir : L.Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Konga
(adv) kecha nunga (nowhere)
* Daniel ama tasü tait nisung **konga** mangutsü.

Kongi
(adv) koleni aoer ? (Where to ?)
* Na **kongi** aoer ?

NAI-A YA METETTER MA?

JULY 2021' NUNG SAYABA KEN KAR:

- Enrique Iglesias - "ME PASÉ" ft. Farruko
- Good Times Ahead - "La Fiesta"
- Hanson - "Only Love"
- Adam Lambert - "These Are Your Rights"
- Andra Day - "All Rise"
- Avelino - "100K"
- Azizi Gibson - "Suspicious"
- Iggy Azalea - "I Am the Stripclub"
- Jennifer Lopez & Rauw Alejandro - "Cambia el Paso"
- Soulja Boy - "Ratio"
- Billie Eilish - "NDA"
- BTS - "Permission to Dance"
- Chris Young - "One of Them Nights"
- Drumma Boy - "Wake Up" ft. Lil Gotit & Kollision
- Peggy Gou - "I Go"

(Maneni asüng adok nung...)

TANÜBO NAI LANGZÜANG

Q. Koba linük nung Delft University of Technology amenoka lir?
A.Netherlands B.Germany C.Greece D.Italy

(Taruba adok nung onoki langzüksü)

YASHI ADOK TELANGZÜBA : Ministry of Social Justice and Empowerment

SUDOKU # 5948

TELANGZUBA # 5949

3	9			1	7				7	2	3	1	4	5	6	8	9	
7		4						2	8	9	4	6	2	3	1	5	7	
2				5		9	7		6	5	1	7	8	9	2	4	3	
	7	9			2	8	3	1	5	1	8	4	9	2	3	7	6	
5					6				3	6	2	8	1	7	5	9	4	
		6	8		4				9	4	7	5	3	6	8	2	1	
8		2			3	7			1	3	5	9	7	8	4	6	2	
	1				9	8	5		2	8	9	3	6	4	7	1	5	
		7						8	6	4	7	6	2	5	1	9	3	8

OJANG LUTEP # 5493

- TSYUBSAENÜ :
- JUTANG :
- NGAMABA :
- URJTANI :
- RABUTSÜR :
- AKTEJ :
- NNUG :
- AKAN :
- TEKTSPLOÜR :
- ANDG :

OJANG LUTEP TELANGZÜBA # 5492

TAJEMREPBA TIA NUNGI AJUNGBENA DANG TSÜNGREMI TAMARENBA JENJANG KATI AJUNGKET

TAN HOPTA ATEMA - KOMA SÜLA ?

Q. Clean election takok angutsü atema voter shia dangi "ni' vote mayoktsü" ta sign südaktsüyonga Signature campaign sentong ka agia ao nunga koma süla ?

Wara anema rarartem külemtsü temsüa lir: PM Modi



August 15, 2021 nü Red Fort, New Delhi nung India nunger 75buba Independence Day anogomong nung Ato kilonser, Narendra Modi-i tawa Tokyo Olympics 2020 nung shilem agirtem ajuruba noksa nung angur.

New Delhi, August 15 (Agencies): Amongnü India nunger 75buba Independence Day anogomong nung Ato kilonser, Narendra Modi-i linük nung coronavirus wara anema rarar doctor tem aser scientist tem nem tenüngsang agütsü.

Amongnü anepdang Red Fort, Delhi nung Independence Day tongti sentong nung jembidang Ato kilonseri linük nung iba wara anema rarar doctors, paramedics, scientists aser medical nung inyakterem nem tenüngsang agütsü.

"Alima nung coronavirus wara mapang asen doctor tem, asen nurse tem, asen

paramedical staffs, vaccine yanglur asen scientist tem aser iba wara anema rarar sensotem külemtsü temsüa lir," ta pai metetdaksü.

Modi-i, alima nung vaccination programme tulutibaji India nung agir, aser tang tashi nung nisung core 54 dak tema nem coronavirus vaccine tutsüogo, ta metetdaksü.

Paisa, hopta 75 'Amrit Mahotsav' mapang nung linük nung yimti balala tsüngda senzütsü atema Vande Bharat Train 75 tenzüksü, ta metetdaksü.

Iba anogomong nung paisa

Mahatma Gandhi, Jawaharlal Nehru, Vallabhbhai Patel, Rani Lakshmbai aser Subhas Chandra Bose nunger densema linük nüchiso atema rarartem nem tenüngsang agütsü.

Modi-isa tawa Tokyo Olympics nung India nungi takok angurtem nema tenüngsang agütsü.

Modi-i Independence Day onük minute 88 shi jembia liasü.

2014 küm Modi-i Independence Day onük minute 65 shi jembia aser 2017 küm nungbo iba anogomong sentong nung pai ghonda kata mejungi jembia liasü.

Sorkari tekong meranga Opposition ola mangar: Ashok Gehlot

New Delhi, August 15 (Agencies): Amongnü Rajasthan Chief Minister, Ashok Gehlot-i, Centre sorkari opposition ola desnema shinga ola mangatsü atema tekong meranger, ta aitsü.

75buba Independence Day anogomong nung linük wako asongba sülen osangbenertem den jembidang Gehlot-i, "Democracy linük nung melung masürtem atema maongka agütsür. Iba maongkaji alitsüla. Parnok (BJP) opposition nung aliba mapang nung parnoki onok aitsü, aser ibaji ajanga taoba mapang railway minister, law minister aser chief minister aikati peisasa menden nungi

anena liasü," ta metetdaksü. Paisa, "Tekong meranga shinga ola mangai linük yimsü sünerterem lir," ta pai ashi.

Congress lenir, Ghelot-isa, yimtenren tsütsü tajangzük angutsü atema Centre sorkari democratic institutions aser agencies aika tim mesüi amshir, aser item rongnung Judiciary, Income Tax Department, CBI aser ED densema lir, ta aitsü.

Ato kilonser, Narendra Modi aija pai, "Tesüiba küm 75 nung taoba mapang Ato kilonser Jawaharlal Nehru tenüng tetshitsü arendaksangji pa dang lir," ta ashi.

"Ato kilonser Modi-i linük nung mezüngbuba Ato kilonser

(Nehru) indang ojang anati jembitsüa aaker, aser iba atemaji ni sasa bilemer. Iba ama shisatsü alirtemi linük koloni anitsü, ta asenoki angatetsüla," ta paisa metetdaksü.

Amongnü anepdang Gehlot-i state yimtiba, Jaipur nung aliba Sawai Man Singh Stadium nung linük wako songja liasü.

Gehlot-i jembiba o ashishia Rajasthan BJP Tir, Satish Poonia-i, "Coronavirus wara mapang nung kidang nungi mayazük, ta nüma tanga jembir mezüngbuba chief minister ji Gehlot lir. 2023 küm Rajasthan-i iba sorkar anentsütsü aser quarantine Congress tashi nungi agientsü," ta ashi.



August 15, 2021 nü New Delhi nung tawa Tokyo Olympics medal angurtem aser tangartemi Ato kilonser, Narendra Modi-i Independence Day sentong nung jembiba angaba noksa nung angur.

SÜR KÜM KA AJUNGBA MENUNGRA BILEMTETER

ASÜR ONENPOKLA (Chuchuyimlang) Asüba Anogo - 16/08/2020



Temeim Oja, Nai onok toktsür orr pungmang ama tanü küm ka ajungba anogo nung onoki na menungra tali bilemteter. Iba lima nung na onok den mali saka nü mapa tajungtembu onok mulungjang nungi kodanga pila modaktsütsü. Nü temoatsü nung onok lia arudar aser nü tsüngsü nung onoki sarasadema teti jajatsü. Temeim agi sünga aliba ojala onoki kodanga mamatetsü.

Temeim Kinungbo, Chirnur, Semchirtem, Anükapang aser Kinungertem.

Mulungnen O



Asür Walutemjen Walling (Süngratsü) 16.04.1986 - 11.08.2021

Temeim asür **Wabong Walutemjen Walling** (Süngratsü) iba lima nungi pilar onok mangyim jashi tia nung alidang, shirnokisa onok dang temeim mapa tajung sayüogo, nenok ajak dang pelaba metetdaksür. Ozü-i nenok dangi tsüngdong arua tepela meshiteter saka Tulusang Tsüngremi nenok nem lepa maojangni ta ozü tamang sarasadem.

Temeim Tsürabur aser Kinungertem.



August 15, 2021 nü Kolkata nung 75buba Independence Day sentong nung West Bengal Chief Minister, Mamata Banerjee-i linük wako asongba noksa nung angur.

India nung Covid agi shiranger 493 asü

New Delhi, August 15 (Agencies): India nung ano nisung 36,083 dak coronavirus putetogo, aser tang tashi nung linük nung nisung ajak senteper 32,192,576 dak iba tashidak puteter, ta Amongnü anepdang Union health ministry-i metetdaksü.

Tesüiba ghonda 24 tsüngda coronavirus agi shiranger 493 süogo aser tang tashi nung linük nung iba tashidak agi shiranga asür 431,225 jungogo.

Health ministry-i ashiba agi, tang linük nung hopta shia coronavirus positive putetba shilem 2 dang kümogo aser anogo shia positive putetba shilem-a 1.88 dang kümogo.

Tang linük nung coronavirus agi teshirangdakpur 3,85,336 lir aser ibaji coronavirus caseload nungi shilem 1.20 dang lir.

Tesüiba ghonda 24 tsüngda

iba tashidak agi shiranger 37,927 anepogo aser tang tashi nung ajak senteper shiranger 31,376,015 anepogo.

Hokolbarnü linük nung samples 19,23,863 tendanga liasü aser August 14 tashi nung samples ajak senteper 49,36,24,440 tendangogo, ta Indian Council of Medical Research-i metetdaksü.

Nationwide vaccination drive kübok tang tashi nung vaccine dose core 54.38 tutsüogo.

Yaküm August 7 nü India nung coronavirus case lakh 20 ajung, September 16 nü lakh 50 ajung, October 29 nü lakh 80 ajung aser December 1 nü coronavirus case core 1 junga liasü.

Taküm May 4 nü linük nung coronavirus case core 2 ajung aser June 23 nü core 3 ajung.

Taliban telok Afghanistan yimtibai aitogo

Kabul, Luroi/August 15 (Agencies): Taliban telungpurtem Deobarnü Afghanistan yimtiba, Kabul telungi aitogo aser United States ajanga par diplomats tem embassy nungi helicopter ajanga anizüker aor aser sorkar minister kati interim administration ka nem tashi agütsütsü, ta ashi.

United States nung September 11 nü lendong agütsüba sülen US-i aniba sepaitemi Kabul nungi atsüngdoker küm 20 lir iba Islamist telungpur ya tanaben linük yimtibai aiter alitsü.

Afghan interior ministry nungi ketdangsur kati, Taliban telok ya tesem ajungalen nungi linük yimtibai aiter, ta osangbener dang ashi. Saka khatapba osangbo mali.

Yimjung nung Kabul bendanga agütsütsü asoshi sorkar den jembishinüba mapang lir, ta Taliban odongtar Zabihullah Mujahid-i sangdong ka nung ashi.

"Yimjung nung temolung süa tashi melenoktsütsü mezüngzüktep tashi Taliban züngsemtem Kabul-i aiba

tesem ajunga nung nokdaka alitsü," ta sangdong ajanga ashi.

US nung amenoka aliba tashi temeteter aser taoba mapang Afghan interior minister inyaka alisang Ali Ahmad Jalali ya Kabul nung interim administration tekolakba shimtsü amai lir, ta diplomatic osang asem ajanga ashi.

Tang tashi Kabul nung Taliban telok senzusempongba mesüra inyaksangshiba puteta mali, ta US ketdangsur kati pa tenüng miimshia ashi.

US itdangiter kati Kabul ya ita asem shi melaotsü ta taoba hopta ang asadangteter lia Afghan sorkar indang defence laoba ajanga diplomats tem süngmang.

Tir Ashraf Ghani nungi iba tensa indang osang kecha mali. Pa ya tang US peace envoy Zalmay Khalilzad aser NATO nungi ketdangsurtem den jembishinüba mapang lir, ta tir aliba kidang nungi ketdangsur kati ashi.

Transitional administration ka nem tashi melenzüktsütsü akok, ta sorkar indang acting

interior minister Abdul Sattar Mirzakawal-i Tolo news channel nung tweet ka nung ashi. "Yimti nung amakba malitsü, yimjung nung tashi m e l e n z ü k t s ü t s ü molungtepogo," ta pai ashi.

Taliban indang political bureau tekolakba, Mullah Abdul Ghani Baradar ya Doha nungi Kabul-i aor, ta Qatar yimtiba nungi Taliban osang ka ajanga ashi.

Wazir Akbar Khan district nung aliba embassy nungi diplomats tem helicopter amshia airport-i anir aor, ta US ketdangsurtemi ashi. Anogo ishika tsüngta Taliban telok Kabul-i aruba sülen America sepai tali yoksema bar nisungtem anizüker aoba nung yariteper.

Deobarnep telungpur tem yagi anüdoklen Jalalabad yimti merarai agia tongtipang highway tem par küboki aitdaksü. Parnoki anasa Pakistan den arütsü nung aliba Torkham border post agi, anungji Afghanistan nungi ainshitsü asoshi Kabul airport ya kisüng sorkar kabu nung anüngzuka lir.

Malaysia PM Yassin Hoimbarnü mapa nungi anentsü

Kuala Lumpur, Luroi/August 15 (Agencies): Tang sorkar tenteta aliba teloktep telok tsüngta meputepba ajanga Malaysia Ato Kilonser Muhyiddin Yassin Hombarnü mapa nungi anentsü, ta Malaysiankini osang ajanga ashi.

Ibai tejangja asünungbo, Muhyiddin menden nungi aliba ajanga office nung ita 17 mepetmesü agi sünga aliba tatem kati arütsü saka COVID-19 cases kanga sashia aliba aser rongsenketzüng jenjang mejungi aliba linük tia tejangja ka monguteti akumtsü.

Tang tashi taruba sorkar shibai kumtetsüar mejangja, kechiaser parliament nung telok tejangja kati menden timba nguteta mali, mesüra tashidak wara agi sünger aliba mapang election agitsü asü masüar ajia mejangjai lir.

Iba sülen kechi ataloktsüar ibaji constitutional monarch, King Al-Sultan Abdullah ajanga lemtetsü.

Muhyiddin-i pa mapa nungi anenba ya Hombarnü chuba nem agütsütsü, ta ato kilonser indang department nung minister Mohd Redzuan Md Yusof-i ashi, ta Malaysiakini ajanga Deobarnü sangdong.

Sorkar kumzuka ayutsü asoshi mera ajak agidanger menden nungi alutsü lemtet, ta

Muhyiddin-i party züngsemtem dang ashi, ta Mohd Redzuan-i Malaysiakini dang ashi.

"Asüng cabinet senden alakteta ka alitsü. Iba sülen pa chuba aliba kidangi oa pa mapa nungi anenba agütsütsü," ta Mohd Redzuan-i ashi.

2020 küm March ita Muhyiddin ya ato kilonser akumba sülen parliament nung pa busemer tera agi ang timba alinung sorkar tashi meiti aru. Ruling alliance nung bloc tulutiba, United Malays National Organisation (UMNO) party nungi ozüng yanglur kar tawa lokzuka aoba sülen pa jenjang mejungi akum.

Pa ato kilonser menden nungi alutsü asoshi telok aikati ajungshia liasü, saka pai September ita parliament nung confidence vote ka ajanga pa busemer timba sayutsü, ta shia liasü.

Saka Hokulbarnü Muhyiddin-i pa ket nung nübu ishiba lir ta nangzük aser confidence vote nung pa busemdaksütsü mechi opposition dang yimtenren aser election agiyim nung temelenshi bener arütsü nangzük. Saka telok katia magizük.

Ato kilonser ka shimtsü asoshi chuba dak tashi lir aser election ajanga shimteta aliba ozüng yanglur tem nungi nübu timba ania alir ka pai shimtetsü.

Haiti menoknok lendong nung nisung 304 asü

Port-au-Prince, Luroi/August 15 (Agencies): Honibarnü Haiti anüolentip nung menoknok tesashi ka anoka nisung 304 süogo, ta ketdangsertemi metetdaksü. Menoknok ajanga tenlaki, hotel, school aser nisung talidak ki aika raksatsüogo.

7.2-magnitude menoknok ya Petit Trou de Nippes jila nungi km 8 shi pilar anak aser iba sülen ano aftershocks ishika arua liasü, ta United States Geological Survey-i metetdaksü.

Iba menoknok anakba ya Cuba aser Jamaica nunga ajangshiogo, koba küm 11 tejakdang magnitude 7 menoknok ka anakba dang nungi tesashiba liasü. Iba menoknok lendong nung nisung meyirejang aika taküm samaogo.

Honibarnü menoknok ya local mapang 8:30 akok shi nung anak aser tetsüngda talangka iter liaka linük yimtiba Port-au-Prince nunga menoknok anakba ajangshiogo, ajisüaka teraksatsüba tulubo madok, ta Reuters atema tenük kuli agütsürtemi ashi.

Haiti indang Civil Protection service-i ashiba agi, menoknok lendong nung asür tang tashi nung nisung 304 lir aser nisung 1,800 shi yirur lir, ajisüaka ano tasüba aser yiruba mejangjaba aika lir. Emergency team tem aser nüburtemi ki chireper aliba nungi nisung aika kümzükogo.



Menoknok lendong nung ki 949, tenlaki tenet, hotel ana aser school asem tagitsü makai raksatsüogo, ta Civil Protection service-isa metetdaksü. Maneni ki 723, tepuokdak ka, health centre asem aser school tenet raksaogo, saka rongnendak, tayimtsü anendak mesera telecoms infrastructure tem nungbo kangabo mekongshi.

Ato Kilonser Ariel Henry, shiba menoknok ajanga teraksatsüba asadangtsü atema iba tesemi oa liasü, pai ita ka atema state of emergency benokba sangdongogo.

Petit Trou de Nippes jila anasa aliba Les Cayes jila nunga ki aika raksago, saka

teraksatsüba ulurabo masü, ta ketdangsurtemi ashi.

Social media nung nüburtemi lemsatepba video tem nung ki chireper aliba nungi nisungtem agitetba aser mozükitem nung nüburtem temang anepalutsü atema adenshia aliba sayuogo.

USGS-isa, anentsüh lendong agi nüburtem aikadak kongshitsü anana nung lir ta metetdaksüogo. Haiti indang Civil Protection service-i, Les Cayes aser Jeremie jila na tsüngda anentsüh agi highway nokdang aliba metetdaksüogo.

Kasa mapang nung Tropical Storm Grace agi Haiti kongshitsü akok, aser iba

ajanga taruba hopta tetenzüklen tzünglu kanga sashia aruba den mopung tesashi agi kongshitsü imlar aser iba ajanga teyari agütsüba maparen nung kongshitsü.

Maneni menoknok agi kongshir aliba tesem leni aoba lenmang nung tongtibang tesemtem telok balalai (gang) amokbanga lir, ajisüaka PM Henry-i, iba tesem leni aoba convoy tem ya police temi miner yoktsü ta shiogo.

Tir Jovenel Moise tepsetba sülen linük yimden yimsütsüba mepetmesü tulu nung aliba mapang ita ka shi dang lir tang iba lendong tulu atalokogo.

Iba den bendenloksema Haiti nungner aika chiyongtsü

maka aser Covid-19 tashidak agi healthcare service tem tawadadak makai kümer aliba mapang nung iba lendong atalokogo.

Iba tesem nungsa 2016 küm Hurricane Matthew agi kongshia nisung noklang aika tepsetba den teraksatsüba tulu bener aruja liasü.

Port-au-Prince nung 2010 küm menoknok tesashi ajangshia aoksaba sülen iba yimti nung alirtem Honibarnü menoknok anakba mapa pei ki toktsür yimtongi aritepa jena ao aser aftershock aruba ajanga pei kidangi moi lendi nung dang atatepa liasü.

"Onok temeket nung asatepba ola ni angashi. Parnok kimai jenshia ao. Parnoki kimai alutsübo angazüker liasü, kechiyong 2010 kümbo nüburtemi kechi inyaksü memeteti liasü," ta Port-au-Prince nung alir Sephora Pierre Louis-i ashi.

Iba menoknok ya Cuba aser Jamaica nunga ajangshiogo, saka kiojen raksaba, nisung asüba mesera yiruba osangbo kecha mali.

US tir Joe Biden-i, Haiti nem teyari agütsütsü atema US Agency for International Development, coordinator, Samantha Power lenisüba nung inyaksangshitsü tetuyuba agütsüogo, ta ashi.

Kasa mapang nung Mexico tir Andres Manuel Lopez Obrador-ia, teyari agütsütsü atema renemtsü tetuyuba agütsüogo, ta ashi.

Nagaland tesem balala nung I-Day mungogo



Mokochung



Changtongya



Longleng



Mon



Noklak



Tuensang

Dimapur, Luroi/August 15, 2021 (TYO): Deobarnü (15.08.2021) Imkongmeren Sports Complex, Mokochung nung 75buba India Independence Day munga liasü.

Iba sentong nung Minister, TPT, Land resources, Nagaland, P. Paiwang Konyak-i Independence Day Speech azüing. Parade Commander, Pholosing Sangtam, NPS, DEF Mokochung aser Second in Command, Kitskha Achumi ABI, DEF Mokochung nati anir Parade contingent - 2nd NAP Alichen, 13thNAP (IR) Home Guards & Civil Defence & State Disaster Response Force-i parade agia liasü.

Iba benjongmung shilem ama, Medem Ruju Cultural club, Mongsenyimti village, Sumi Union, Mokochung town aser Konyak Union, Mokochung town nungeri sobaliba dak sendakba balala sayuogo.

Mokochung District nung Covid-19 wara adokba mapang, nürtem iba tashidak nungi kümzüka ayutsü shilem tajung agiba atema, Minister Paiwang-i 'MTBA Eleos Initiative' nem District Award agütsü. Ano COVID-19 mapang DTF Ambulance service nung volunteer ama bendanga agütsür inyakba atema Aotsung Ozukum aser Moamongba naprongla nem District Award agüja liasü.

Lokti nem teyari agütsüba/tenzüka wadang tsütsü district nung NGOs balala yariba; district nung sorkar aser ali kibur tsüingda ali nung mangatetep adokba tsütsü tongti shilem agia telemtetba tajung agütsüba jangjateta Minister Paiwang-i Limanungsang Kichu nem District Award agütsüogo.

Covid-19 vaccine shilem 100% ayimjema (temsüa alirtem) agiba atema, Moalenden, Longjemdang A, Khensa, Salulemang, Mongsenyimti, Yaongyimsen, Nukshiyim, Lizo Model yimtsüing tem aser Sabangya compound nem tenüngsang agüja liasü.

Tawa sangdong HSLC tatidang nung toppe ana - Town Higher Secondary School, Mokochung nungi Maongla Longchar (HSLC Examination 2021 nung Rank 11buba) aser Christian Standard Higher Secondary School Changtongya nungi Yashijungla (HSLC Examination 2021 nung Rank 16buba) naprongla nem tenüngsang agütsü. Iba anogomung nung District Level Centre for Women-Mahila Shakti Kendra (BBBP) kübok temaba jenjang ajanzükteter kaketshir anaprongla nem tenüngsang agütsüogo.

Kasa anogo, Minister Paiwang-isa Exhibition Stall tem lapoktsü, koba Agri. aser külem sendaktepa alir department ajanga item stall achaayanga liasü.

* Changtongya:

Changtongya Sub-Division kübok SDO (C) Office Complex nung 75buba Independence Day mungogo. Iba anogomung sentong nung Rorheu Peseyie (NCS) SDO (C) Changtongya tongti tesemdang ama dena liasü.

Iba sentong agiba mapang, Rorheu-i Linük wako salatsü aser DEF Police Station Changtongya nungi Rashtriya salute agia liasü. Iba sülen Rorheu-i telok den Independence Day osang lemsatp. Iba sentong nung, Office tekolakpur ajak, ward chairman aser GBs tem aruagi denogo.

* Tuensang:

Parade ground Tuensang nung 75buba India Independence Day mungogo, kong Advisor, Power Department, H. Tovihoto Ayemi alakteta tejaoker ama aruagi sentong nung dena liasü.

DIG Range Tuensang, Rajashekera IPS ajanga parade sema liasü. Contingent talisa - DEF Tuensang, 3rd NAP, VG Ngangpong, VG Kuthur aser 3rd NAP Pipe band temi march pass nung shilem agia liasü, kong Parade Commander DySP Shikato Swu aser Tohanba ABI nati iba parade ketdangsüa agi.

Independence Day benjongmung nung, nisung 9 nem District Commendation award agütsü. District Commendation award angurtemji - P. Yingei Chingkhong, Sr. HA, Sao Chang Government College; Thungti Lempong Chang, Information Assistant, DPRO; Hanstsula Yimchunger LDA, CMO; Tsarise Sangtam Driver, DPO ICDS; Likhumse Sangtam, Team Leader COVID Care Centre; Yongsentela, Asst. Nursing MS District Hospital; A. Kilemsungla, Nursing Sister MS, District Hospital; Hav. Sangthing Khaimniungan DEF aser Bumet Chollen Chang Lineman Power dept. nunger liasü.

Iba benjongmung shilem ama, Chang Cultural troupe team CCSU, Sangtam Cultural Troupe aas Yimchunger Cultural Troupe temi sobaliba dak sendakba balala sayuogo. Iba den külemi entertainment mapang Confederation of Chang Students Union-ia shilem agia liasü.

Parade Ground nung, Agri aser külem sendaktepa alir Department ajanga

achaayanga amenokba stall tem Advisor, Department of Power GON, H. Tovihoto Ayemi-i lapoktsü aser GBs Court semdang, kong Advisor-i district indang GBs den ajurutepa jembia liasü.

* Noklak:

NoklakHq nung 75buba Independence Day benjongmung agiba mapang, Minister, Soil & Water Conservation, Geology & Mining, Government of Nagaland V.Kashiho Sangtam-i linük wako atsüketa liasü.

DEF/3rd NAP Noklak, Village guard Yokao/Panso Hq aser Village guard Aniashu indang contingent temi parade nung shilem agiba mapang Kashiho Sangtam nem Rashtriya Salute agütsü. Assistant Commandant 3rd NAP, Logubo Nsu aser 2nd Parade Commander ABI, Imkummeren Ao nati anir contingent temi shilem agi; aser CHM 3rd NAP Noklak Simon-i wako am aser Pilot driver Khaikho liasü.

Kasa sentong nung Minister Kashiho-i District Commendation Award agüja liasü. T.Mucho Khaimniungan PGT, GHSS, Noklak; P.Yamso Shiu PT, GHS Thonoknyu; M. Tsongtsa, GT GMS Nokhu; P.Thento PT GMS Noklak HQ; C. Esther PT GPS Noklak St.Paul School Noklak; S. Chongliu, Asst.Teacher, Christian High School, Noklak; T. Sulem, Agriculture Field Assistant, Agri office Noklak aser K. Lam, Dobashi Gr.II, DC Office, Noklak nungeri District Award agizük.

Azadi Amrit Mahotsav shilem ama District Administration, Noklak ajanga ayongba Open Online Quiz Competition nung takok angur tenüngtem iba sentong nung

sangdonga liasü.

Yokao Village Guard ajanga sobaliba tsüingsang ka sayu. Iba anogomung nungtem nung, Red Cross Society, Noklak-i Community Health Center, Noklak semdang. Iba sentong tembanga 3rd NAP Noklak ajanga 'Beating Retreat' sayua liasü.

* Longleng:

Public Ground, Longleng nung 75buba Independence Day benjongmung mungogo. Iba sentong nung Speaker, Nagaland Legislative Assembly, Sharingain Longkumer alakteta tejaoker ama dena liasü.

Iba sentong nung, Longkumer-i linük wako salatsü aser DEF Longleng, 12th NAP (IR) Chingtok, Village Guard Yaongyimchen & Yachem, Yingli College aser Students Police Gadget Bautung Government Higher Secondary School indang contingent pungo agi salute agütsü. Iba sülen ceremonial parade aser Independence Day speech agüja liasü.

NLA Speaker, Sharingain-i district award aser poetry slam award agütsü. Crossroads ajanga ken ka aten, poetry slam competition nung takok anguri Sangro ka azüing, Yongnyah cultural troupes (Tetsür) aser Bhumnyu cultural troupes (Tebur) nati sobaliba tsüingsang sayu.

Officer's Club Longleng aser Phom Students Conference tsüingda Football exhibition match asaya. Ano, Longleng Town Students Union aser Phenei Soti Club na volleyball exhibition match asaya liasü.

Sorkar tentet balala, NGOs aser SHGs temi achaayanga stall balala Sharingain-i lapoktsü aser pai item stall semdanga liasü.

Awang aser Imlimerenla nati Virtual Football Skill tetoktepba kokogo CWG nung West Indies tenung nung Barbados asayatsü



Awang Konyak

Imlimerenla Jamir

Renchan Odyuo

Kohima, Luroi/August 15 (Agencies): Awang Konyak aser Imlimerenla Jamir nati Nagaland Virtual Football Skill Competition tetsür aser tebur tetoktepba kokogo. Iba tetoktepba ya Department of Youth Resources and Sports (DYRS) Nagaland-i ayonzüka liasü.

Tetoktepba result Deobarnü sangdonga liasü. Tetokteperem ya techniques, execution, skills, accuracy, tricks aser creativity dak ajemdaker tetendangertemi tendanga liasü.

India nüjiso ngur küm 75 ajungba nungtem nung iba tetoktepba ya ayongzük, koba July 1 nü nungi August 14 nü tashi agiogo.

Nagaland Virtual Football Skill Competition ya football asayar aser freestyler tem nem

parnok sempet sayutsü atema sabang ka agütsütsü nükjidong nung ayongzük. Iba ajanga ita aika asayaba moapu nung masayateti aliba asayartem nem tokteptsü atema maongka agütsür aser parnok ajungmesor.

Tetsürtem rongnung Mokokchung district nungi arishi küm 17 tain Imlimerenla Jamir-i tetoktepba akok aser tanabuba aser tasembuba jenjang nung Mokokchung district nungisa arishi küm 22 tain B. Watijungla aser Mon district nungi arishi küm 17 tain Neke Konyak na liasü.

Teburtem rongnung Mon district nungi arishi küm 17 tain Awang Konyak-i tetoktepba akok aser Dimapur district nungi arishi küm 18 tin Thungcheva Lotha aser Mon district nungi arishi küm 19 tain

Aching Anns nati tanabuba aser tasembuba jenjang tongtet.

Tetsür aser tebur naprongla atema champion nem sen 10000, runner's nem sen 7000 aser tasembuba jenjang nung tembangba asayar nem sen 5000 agütsütsü.

Tetoktepba nung tanubosangji Bhandari jila nung arishi küm 6 tain Renchan Odyuo liasü aser pa nema senpet sen 1000 agütsütsü. Kasa mapang nung viewer choice award Thungcheva Lotha nem agütsüogo aser pa nem sempet sen 1000 agütsütsü.

Kasa mapang nung Director of Youth Resources and Sports, Akumla Chuba-i, iba tetoktepba nung Nagaland kübok tesem balala nungi tetsür pongu densema nisung 21-i shilemagia liasü ta metetdaksü.

Olympic ayongzüka asayatsü atema Delhi-i bit asütsü: Kejriwal



New Delhi, Luroi/August 15 (Agencies): India nüjiso ngur küm 75 ajungba anogo Delhi Chief Minister Arvind Kejriwal-i, Olympics ayongzüka asayatsü atema linük yimtibai bit asütsü ta ashi.

"2047 sülen Olympics ayongzüka asayatsü atema benoktsü asoshi onok renemtsü. Olympics ayongzüka asayatetsüsa jenjang kati Delhi ajungkettsüla," ta Kejriwal-i ashi.

Kejriwal-isa, India nunger Olympics nung asayartem nem tenüngsang agütsü aser ashiba agi, takok tali angutsü atema linüki merangtsüla.

"Olympics nung medal angurtem nem tenüngsang agütsür. Medal 70 atema

renemtsüla," ta Delhi CM-i ashi. Kejriwal-i, 2047 küm India nüjiso ngur küm 100 ka ajungba mapa tashi nungbo Delhi nung Olympics ayongzüka asayaner ta shia aruogo.

Taruba Olympics asem asayatsü asoshibo yimtitem shimatokogo. 2024 küm Paris nung asayatsü aser iba sülen 2028 küm Los Angeles nung aser 2032 küm Brisbane nung asayatsü renematokogo.

Delhi sorkari 2048 Olympic Games ayongzüka asayatsü sentong aliba taküm March ita sangdongogo aser iba nükjidong ya tongtettsü atema Deputy Chief Minister Manish Sisodia-i, infrastructure tapet yanglutsü aser saisapong renloka odaktsütsü atema jenjang

renemtsütsü ta ashi.

"Taruba Olympics asayatsü atema yimtitem shimadokogo. Sports University tasen ka amenokba ajanga sports facility tem aser saisapong tetokteptsü atema jenjang renemshitsü sorkar nükjidong lir, ajita asünungdang 2048 küm 39buba Olympic ayongzüka asayatsü atema apply sütettsü," ta Sisodia-i ashi.

"Asayamung ayongtzü atema mapang talangka lir ama bilemer saka 2048 küm matong tsüngda küm 10 jelia bid asütsüla. Aji masüdang küm 15 infrastructure tem amenoktsüla aser asaya renloka odaktsütsü atema jenjang yanglutsüba den linük nung asayartem 2048 küm Olympics matong tsüngda tetoktepba balala nung medal ngutettsüsa parnok jenjang ajungkettsütsü nungdaker," ta paisa ashi.

Delhi nung 1951 küm mezüngbuba Asian Games ayongzüka asaya aser iba sülen 1982 küma kasa asayamung ayongzüka asaya. Kasa mapang nung 2010 küm linük yimtiba nung Commonwealth Games ayongzüka asayaogo.

Luroi/August 15, 2021 (Agencies): Taruba küm West Indies tenung nung Barbados tetsür team asayatsü, ta Cricket West Indies (CWI)-i sangdongogo.

CWI Board of Directors-i T20 Blaze aser Women's Super50 Cup thinenttsü atema teletmetba agiba sülen iba osang sangdonga liasü. Iba asayamung ana ya taruba küm CWG atema West Indies asoshi qualifying asayamung liasü.

"Asayamung thinenba sülen Barbados tetsür team West Indies tenung nungi asayatsü, kechiyong parnoki 2020 CWI T20 Blaze asayamung kokogo koba International Cricket Council (ICC)-i agizüker aliba Commonwealth Games Association Tournament temzüng ozüng den tapet lir," ta CWI-i ashi.

1998 küm sülen CWG nung maneni cricket asayatsü teletmetba agiogo aser tetsür cricket asaya 2022 küm Birmingham nung ayongzüka asayatsü aliba asayamung nungi

tenzüka asayatsü. West Indies aser South Africa na tsüngda ODI aser T20I asayamung August 13 nungi September 19 nü tashi asayatsü atema teletmetba agiba sülen tetsürtem asayamung ana ya thinenttsü atema teletmetba agia liasü.

"Taküm Women's T20 Blaze aser Women's CG Insurance Super50 Cup thinenttsü atema onoki teletmetba agitsüsa dang aküm," ta CWI CEO Johnny Grave-i ashi.

"Commonwealth Games 2022 nung West Indies tenung nungi asayatsü atema Barbados team shimba atema parnok nem tenüngsang agütsür.

"Gold medal atema toktepba mapang parnoki tajungtiba asayatsü imlaja atar aser parnoki maneni West Indies nema dangdaksütsü ta onoki meteta lir," ta paisa ashi.

Grave-i, board-i tetsürtem atema high performance camp tem aser international fixtures tem nung senotsü intokogo, ta ashi.

Noami Osaka-i senpet Haiti nem tenla agütsütsü nangzük



Luroi/August 15, 2021 (Agencies): Naomi Osaka-i Taruba hopta asayatsü aliba Western & Southern Open nung lai aazükba sen ajak Haiti nung menoknok agi kongshir alirtem nem teyari agütsütsü atema tenla agütsütsü nangzükogo. Osaka tebu ya Haiti nunger lir.

Honibarnü 7.2-magnitude menoknok ka agi Haiti kongshia nisung 304 asüba den nisung aika yiruba sülen Grand Slam pezüben tashi koker alila yagi lai aazükba ajunga tenla agütsütsü atema mulungteta liasü.

"Haiti nung teraksatsüba balala adokba ngua temulung kanga raksar aser anisüngzüktsü asoshi mapang mangur ama bilemer," ta Osaka-i tweet asü.

"Ni iba hopta asayamung ka

nung asayatsü lir aser ni asayamung nung aazükba sen ajak Haiti nung teyari maparen balala atema tenla agütsütsü. Onok tashitati kin ka ta ni meteta lir anungji onok maneni nokdaksü," ta lai ashi.

World number two Osaka shiba tetsü Japan tsür aser shiba Japan tenung nungi asayar, lai la jenjang amshia lai kanga süoki ia bilemba maparen ka asoshi ayongzükogo.

Lai taoba küm U.S. Open asayaba mapanga police inyakyim mishidakba ajanga taküm samartem tenung ajenoker mask sema liasü.

Cincinnati asayamung nung Osaka tanabuba seed asayar asütsü. Iba asayamung ya August 14 nungi 22 nü tashi asayatsü.

BILEMDANGANG
 "Tangar majung dang bilema alirtem kodanga pela malir."